

PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEDUA,
PARLIMEN KEEMPAT BELAS

PERTANYAAN : LISAN

**DARIPADA : TUAN WILLIAM LEONG JEE KEEN
[SELAYANG]**

TARIKH : 10 JULAI 2019 (RABU)

SOALAN NO. 63

Minta **MENTERI HAL EHWAL EKONOMI** menyatakan perkembangan industri baharu yang akan diwujudkan oleh Kerajaan dan bagaimana industri baharu ini menyumbang kepada pembangunan ekonomi negara.

JAWAPAN

Tuan Yang di-Pertua,

1. Gagasan Kemakmuran Bersama yang menjadi falsafah dan tulang belakang kepada penyediaan Rancangan Malaysia Kedua Belas (RMKe-12) yang proses penyediaannya telahpun bermula. Gagasan ini akan menitikberatkan dan mengutamakan kepentingan rakyat dan bukan hanya sekadar meningkatkan pertumbuhan ekonomi semata-mata.
2. Perancangan pembangunan ekonomi pasca 2020 adalah berasaskan Gagasan Kemakmuran Bersama yang memberi tumpuan kepada tiga dimensi yang terdiri daripada pengupayaan ekonomi, alam sekitar dan *social re-engineering*.

3. Justeru, selaras dengan fokus utama dalam usaha merangka Rancangan Malaysia Ke-12, tiga industri utama telah digariskan oleh YAB Perdana Menteri iaitu ekonomi digital, aeroangkasa, dan ekonomi biru (*blue economy*).

Tuan Yang di-Pertua,

4. Bagi sektor aeroangkasa, Kerajaan Malaysia adalah komited melaksanakan Pelan Induk Industri Aeroangkasa Malaysia 2030 (Malaysian Aerospace Industry Blueprint 2030). Di bawah pelan ini, Malaysia menyasarkan untuk menjadi sebuah negara peneraju sektor aeroangkasa di rantau Asia Tenggara menjelang 2030 dan meningkatkan integrasi ke dalam rantaian bekalan antarabangsa (*global value chain*).
5. Seterusnya, Kerajaan sedang mengkaji penyediaan pelan pembangunan sektor ekonomi biru (*blue economy*) yang merangkumi aktiviti sosioekonomi di kawasan persisir pantai dan marin.
6. Ekonomi digital akan disenaraikan sebagai satu komponen dalam kerangka konsep hala tuju perancangan pembangunan negara pasca 2020 dan didokumenkan di dalam RMKe-12 yang dirancang untuk dibentangkan ke Parlimen pada tahun hadapan. Tiga aspek utama akan diberikan tumpuan iaitu industri digital, infrastruktur digital dan keterangkuman digital.
7. Industri-industri baru seperti ekonomi digital, aeroangkasa, dan ekonomi biru (*blue economy*) adalah sebahagian daripada usaha Kerajaan mempertingkatkan industri Malaysia ke arah penghasilan produk dan perkhidmatan yang kompleks dan bernilai tambah tinggi, selaras dengan matlamat Kajian Separuh Penggal Rancangan Malaysia Ke-Sebelas dan usaha merangka Rancangan Malaysia Kedua Belas.

Sekian, terima kasih.